




# KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 3, No. 5

website: [www.geocities.com/navalbec](http://www.geocities.com/navalbec)

December 2006



Most Rev. Filomeno G. Bactol, D.D.

## Mensaje

Pasko na. Apan malipayon ba kita sa pag-abot sa Pasko?

Tingale masulub-on kita sa pag-abot sa Pasko tungod kay mahal ang mga palaliton. Dili na halos kita makapamalit sa

mga gusto nato nga paliton tungod kay nagtikakunhod man ang balor sa piso.

Tingele masulub-on kita tungod kay nagtikalisud ang atong panginabuhì. Daw wala nay paglaum pa nga mahawas kita sa kalisud tungod kay ang kawad-on daw mora na ug kanser nga nakatapot na sa atong adlaw-adlaw nga panlimabasug aron lamang mabuhì.

Tingale masulub-on kita tungod sa kagubot nga gihatag kanato sa pamolitika karon. Gikan sa nasyonal hangtud sa lokal nga mga isyu naputos kita sa mga pangutana hangtud kanus-a matapos kining tanan: corruption, extra-judicial killings, hulga batok sa pamilya, hugaw nga eleksyon, charter change (cha-cha), ug uban pa.

Apan sa usa ka bahin, dili ba mao man kini ang rason ngano nga nagpakatawo ang atong Ginoo: aron mahawas ug maluwas kita sa mga naghatag kanato ug kasubo? Nan ngano man nga hangtud karon wala pa man nato matagamtami ang gipangandoy nato nga kaangayan ug kaluwasan; hinunua, mora man ug nagtika-ut-ut hinuon ang atong kahimtang?

Tingale tungod kay sa atong pagsaulog sa Pasko, nahikalimtan nato ang tinuod nga diwa niini. Dili ang mga dayandayan mao ang Pasko, kundili si Hesus. Gidawat ba nato siya sa atong kinabuhì? Kung gidawat, aduna bay pagbag-o nga makita sa atong kinabuhì? Ug miawas ba ang grasya sa pagbag-o ngadto sa pagbag-o usab sa atong katilingban? Mao kini ang angay natong pamalandungan.

Pasko na. Ug ang tinuod nga diwa sa Pasko mao si Hesus nga gipakatawo nato pag-usab diha sa atong mga kasingkasing aron magdala kanato sa pagbag-o.

Dali, maghiusa kita ug buhion ta ang diwa sa Pasko. Dali, sugdan ta ang pagbag-o.

Bishop FILOMENO G. BACTOL, D.D.  
ug mga Kaparian sa Naval



## PAMALANDONG SA

## EBANGHELYO

**December 3, 2006:** Unang Domingo sa Adbiyento  
Basahon: Jer.33:14-16 / 1Thes.3:12-4:2/Lk. 21:25-28, 34-36

### Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandong kanimo? Ngano man?

### Tema: (Basahon human sa mga paambit)

Ang unang katilingban sa mga Cristyanos nagpuyo diha sa duruha ka pagpaabot.

Una, ang pag-abot sa Ginoo sa iyang pagpangalagad dinhi sa kalibutan ug ikaduha, ang iyang pagbalik sa katapusan sa panahon. Agig pagpangandam alang niining Parousia kon ikaduhang pagbalik sa Anak sa Tawo – nga ilang gituohan nga mahitabo gayod sa labing madaling panahon – nakita nila nga kinahanglang lig-on silang mamugna diha sa kasantos nga dili ikagsaway. Apan ang mga Cristyanos nga gisulatan ni San Lucas nagsugod na sa pagsaksi sa kalamboan ngadto sa usa ka bag-ong kaamgohan. Bisan kon si Hesus kanunayng ana-a diha sa katilingban ug motambong siya sa takna sa kamatayon sa matag usa, ang katapusang pag-abot wala pa mahitabo. Ang pagpaabot mas dugay pa kay sa unsay gidahom mga mahitabo.

Busa ang kinaiya nga gikinahanglan nga batonan sa mga magtutuo mao kanang kanunayng pagtukaw: ang kanunayng pag-andam alang sa unsay mahitabo, ug ang kanunayng pagtukaw pinaagi sa walay hunong nga pag-ampo.

### Pamalandongi kini:

- Ikaw kanunay bang andam sa pag-abot sa Ginoo?
- Sa walay hunong nag-ampo ka ba?

**December 10, 2006:** Ikaduhang Domingo sa Adbiyento  
 Basahon : Bar. 5:1-9 / Phil 1:4-6, 8-11 / **Lk. 3:1-6**

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Ang Ebanghelyo karong adlawa naghigot mahitungod sa Magbubunyang, nga maoy nagbutyag niining talagsaong hitabo. Ang Ebanghelista nagtaho sa kang Juan nga nag singgit didto sa kamingawan. Gihulagway niya ang iyang misyon: ang pag-andam og dalan, ang pagtul-id sa dalan. Tapos sa hataas nga kahilom- kay wala naman magpadala ang Dios og ilhanan ni propeta- nakighinabi na usab ang Dios. Ang lanog niyang tingog nagdahunog latas sa kamingawan Kini nagmantala sa pihong pag-usab sa dagan sa kasaysayan sa kalibutan. Sa katapusang higayon mitumaw ang diosnong panabang nga maoy naghingpit sa mga gilauman kaniadto. Ang Dios moabot na gayud!

Apan sa unsang paagi? Sama bag kometa kansang masanag nga ikog mobathay sa kalangitan panahon sa kagabhion? Sama ba hinoon og kilat nga sa kalit modan-ag ug unya mangitngit lang sab dayon. Dili, kay kining maong Pulong nga mosulod sa atong panahon magbag-o man sa tanang tawhanong kasaysayan: “Ang tanang katawhan makakita sa kaluwasan sa Dios.” Apan aron makakita kita kaniya kinahanglang magpakamatay una kita sa atong kaugalingon diha sa pagbag-o pag-usab niini. Mao kini ang mensahe ni Juan.

Taliwala niining nagdilaab nga tingog sa kasaysayan, ang Dios misulti. Pinaagi sa makiangayong kinabuhi sa katilingban sa mga

magtutuo, sila sa walay puas nagdapit sa katawhan ngadto sa bag-ong exodo.

**Pamalandongi kini:**

Sa unsa mang paagiha miabot ang Dios sa imong kinabuhi? Ikaw nagpatalinghug ba sa iyang tawag sa pagbag-o ug pag-usab sa kaugalingon?

**December 17, 2006:** Ikatulong Domingo sa Adbiyento  
 Basahon : Zep. 3:14-18/ Phil. 4:4-7 / **Lk. 3: 10-18**

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Sa dihang gisulat ni San Lucas ang ebanghelyo pipila ka tuig human misaka ang Ginoo sa Langit, ang Simbahan – pinaagi sa pagpangalagad sa mga Apostoles – maoy nagtanyag sa Cristohanong bunyag pinaagi sa Espiritu. Ang kang San Lucas nga pagsaysay mahitungod niini – sa walay duda – mabase gayod sa kasaysayan. Apan labing importante alang kaniya ang kasaysayan sa kaluwasan nga padayong gibutyag diha sa unang mga Cristohanong katilingban. Ang pagpaabot sa haduol nga katapusan nagkahanap. Ang mga awhag sa Magbubunyang sa pag-usab nakaangkon og bag-ong kahulugan. Sila nagsukna sa pagbag-o sa atong pagkinabuhi adlaw-adlaw.

Dinhi gihisgutan ni San Lucas ang mga panon sa katawhan nga may maayong kabubut-on. Kini sila nagagikan sa tanang hut-ong sa katilingban. Sa ilang pagpamati sa pagwali ni San Juan, sila nakaamgo nga kinahanglan magbag-o ug mag-usab sila sa ilang kinabuhi. Sama kanila, kita usab



**KATILINGBAN**  
 Ang atong mga mensahe sa Dios: Ewanghelyo, Comunion, EUC, sa parokya sa Misa

**TEAM MINISTRY**

*Team Moderator:* Bishop Filomeno G. Bactol, D.D.

*Team Members:*

- Fr. Marvyn A. Maceda
- Fr. Florencio Gerones
- Fr. Kenneth Hendricks
- Fr. Cornelio Amante, Jr.

*Newsletter Moderator:*

Fr. Marvyn A. Maceda

*Encoder:*

Vinna Sabroso

*Computer Specialist*

Oscar O. Borrinaga

*Business Managers:*

- Rizalito V. Curso
- Conchita Calvez

**PARISH FORMATION TEAM**

- |                  |                    |
|------------------|--------------------|
| Eudoxia Canonoy  | Reymund Icaín      |
| Linda Roldan     | Jonnel Quilaneta   |
| Necitas Casado   | Alfredo Olaer      |
| Catalina Machete | Alfredo Paghubasan |
| Sonia Pitao      | Danny Jayubo       |
| Josephine Romero | Gualberto Tonelete |
|                  | Ramises Bongabong  |
|                  | Jorge Manco        |
|                  | Buddy Castro       |

makapangutana, “Unsa may angay namong buhaton? Agig pasiuna sa atong pagkakabig, gikinahanglan nga isalikway ta ang tanang matang sa pagsalig sa kaugalingon. Kinahanglan tagdon nato ang mga pulong nga nagtulisok kanato sa ingon mamahimo kitang bukas ngadto sa mga panginahanglan sa atong isigkatawo. Ug sa tanang hitabo motubag kita sa atong obligasyon alang sa katilingbang kaayohan sa atong isigkatawo. Ug sa tanang hitabo motubag kita sa atong obligasyon alang sa katilingbanong kaangayan, sa pagtinabangay ug sa paghigugmaay.

Uban kita niadtong bagang duot sa katawhan nga mibukas sa ilang kinabuhi ngadto sa “dili makita” aron sama kanila kita usab mamahimong “katawhan nga nagpaabot”

Daghan pang mga nag-uuna nga motumaw sa atong kinabuhi aron pag-andam og dalan pinaagi sa pagsukna kanato mahitungod sa kinabuhi ug sa kamatayon. Ang mga propeta kanunayng nagpunting kaniya nga mas gamhanan pa kay kanila. Siya mao ang atong gipaabot: si Hesus, nga kanunayng nagbunyag kanato pinaagi sa kalayo ug sa Espiritu.

### **Pamalandongi kini:**

Mao kini ang konkretong pagmatuod nga ikaw nagbag-o ug nag-usab na: kon ikaw kahibalo nang motubagag sa imong obligasyon alang sa katilingbanong kaangayan, sa pagtinabangay ug sa paghigugmaay.

**December 24, 2006:** Ika-Upat nga Domingo sa Adbiyento  
Basahon : Mt. 5:1-4 / Heb. 10:5-10 / Lk. 1:39-45

### **Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

### **Tema:** (Basahon human sa mga paambit)

“Bulahan ka nga mituo nga matuman gayod ang mensahe sa Ginoo kanimo!” Ang mga pulong ni Isabel nagpasabot gayod sa Pagpahibalo sa Anghel kang Maria kay pinaagi niini ang Espiritu Santo naglandong man kang Maria. Ug siya nahimong Inahan sa Dios. Ang pagduaw ni Maria kang Isabel naghingpit ug nagmatuod sa mensahe sa anghel. Kini nagpadayag lang sa lihok sa Espiritu Santo nga

naglamdag sa mga ulohang magdudula sa kasaysayan sa pagkatawo sa Anak sa Dios.

Si Maria maoy mihimo sa unang Apostolikanhong panaw aron pagpaambit sa iyang kalipay ngadto sa iyang ig-agaw. Si Isabel usab nagpaubos sa iyang kaugalingon atubangnan sa iyang bisita ug gibulahan niya si Maria labaw sa tanang kababayen-an. Tungod sa kalipay si Juan milukso sa kalipay. Dinhi nagsugod nang daan ang iyang tahas sa pagkamag-uuna. Kining mga mapaubsanong mga ilhanan nagpadayag lang nga sukad sa pagpanamkon ni Maria kang Hesus ang sapa sa kinabuhi mitubod aron matubigan ang tibuok kalibutan.

Kining samang hitabo sa Ebanghelyo gipuy-an pag-usab sa matag higayon nga ang mga Cristyanos magmantala ngadto sa usag-usa uban ang kaligdong sa kasingkasing mahitungod sa presensya sa Dios diha sa ilang tagsa-tagsa ka kinabuhi ug sa matag higayon nga magsaulog sila nga mapasalamatong tungod sa mga katingalahang butang nga gihomo sa Ginoo alang kanila.

### **Pamalandongi kini:**

Dili malalis nga sa matag usa kanato ang Dios naghimog katingalahang mga butang. Ikaw nagmapasalamatong ba tungod niini? Imo ba kining gimantala sa imong isigkatawo aron ikaw uban kanila magahatag og pagdayeg ngadto sa Dios?

**December 31, 2006:** Ang Santos nga Banay: Hesus,  
Maria Ug Jose  
Basahon: 1 Sm.1:20,244-28/1Jn.3:1-2, 21-24/Lk. 2:41-52

### **Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

### **Tema:** (Basahon human sa mga paambit)

“Bisag unsay inyong buhaton o isulti, himoa kini sa ngalan sa Ginoong Hesus” Apan tanan natong mga kalihokan kinahanglan atong tan-awon nga nahidugtong uban sa buhat sa Dios. Sa atong pagsaulog niining Pasko sa Pagkatawo sa atong Ginoo, makapamalandong kita sa presensya sa Dios bisan pa diha sa labing kalibutanong mga dapit. Niing iyang presensya, makakaplag gayod og

paglaum ang mga ginikanan, mga kabataan, mga gagmayng katilingban, mga nag-inusara, mga batanon og mga tigulang.

Ang mga pagbasa karong Domingoha naghulagway sa tin-aw kaayong malipayong panimalay sa ilang kapanahonan. Bisag diha sa pag-amoma sa mga katigulang nga ginikanan o diha ba hinuon sa mahigugmaong pagpakiglambigit tali sa bana'g asawa, malungtarong nag-awhag ang maong mga mithi. Apan kining mga mithi nangingahngan og kanunayng bag-o nga paghubad diha sa atong adlaw-adlawng pagkinabuhui. Sa unsa man diayng paagiha motubo ang atong relasyon kon atong gihimo ang tanan sa ngalan ni Cristo Hesus?

Matag tuig ang mga pagbasa sa Ebanghelyo nagsaysay kanato sa nagkalainlaing mga yugto sa kinabuhi ni Hesus sa bata pa siya. Ang iyang malipayong panimalay, ang Balaang Banay, simple ra kaayo. Niini tuig C sa Simbahan, gisaysay ang hitabo sa dihang miduaw sa templo si Jose og Maria uban ang Batang Hesus nga nagpanuigon og dose anyos. Kini nagtilimad-on sa iyang unyang sangpotan ug sa kagubot nga iya unyang mahiaguman.

Sa ilang pagpakiglambigit sa usag-usa sulod sa ilang banay, si Jose, Maria ug Hesus naghimo niining tanan sa ngalan gayod sa Dios. Sa atong kaugalingon kasaysayan karon, kinahanglang ato usab nga himuon ang tanan sa ngalan Niya nga miabot ug nakig-uban kanato.

#### **Pamalandongi kini:**

1. Nakaamgo ka ba nga bisan sa labing tawhanon mong kasinatian anaa ang Dios?
2. Sa imong pagpamuhat, sa kang kinsang ngalan mo kini gihimo?



**BEC Parish Office**

## **BEC Activities**

December 2, 2006 (Saturday)

### **CLUSTER FELLOWSHIP**

BEC Ilaya & Smo. Rosario  
Lugar: Cathedral Church  
Oras: 7:00 PM. – 10:00 PM

December 9, 2006

### **Diocesan Launching of the Political Education Campaign**

Venue: Naval Cathedral  
Tiime: 8:00 A.M. - Mass  
Parade  
(Giimbitar ang tanan sa pagtambong. Giawhag usab pagdala ug balon alang sa paniudto)

December 17, 2006

### **PARISH & BEC CHRISTMAS GATHERINGS**

All BEC's, Religious Movements & Cofradias  
Lugar: NIT Gym  
Oras: 8:00 A.M - 3:00 P.M.

## **B E C A N N I V E R S A R Y**

December 7, 2006

BEC Sitio Mangga

December 14, 2006

BEC Sabang, Sto. Nino

December 8, 2006

BEC Brgy. San Pablo

December 15, 2006

BEC Takung

December 22, 2006

BEC Brgy. Caraycaray zone 3

**LJC Rice Mill**

Sitio Lupa, Calumpang

**& Groceries**

Ground Floor, Naval Mall

Owned & Managed by:

**RAMISES "Bong" BONGABONG**